

CONVENIO DE COLABORACIÓN ENTRE A AXENCIA TURISMO DE GALICIA E O CONCELLO DE ABEGONDO PARA A SEGUNDA FASE DO PROXECTO DO PLAN ESTRATÉXICO DO ENCORO DE BECHE

MEMORIA XUSTIFICATIVA

O xerente de Turismo de Galicia

DECLARA:

Que esta Axencia Turismo de Galicia formalizou co concello de Abegondo o instrumento convencional arriba referido por un período de vixencia que abrangue dende o día da súa sinatura ata o 31 de decembro de 2022.

Que o instrumento convencional ten por obxecto establecer o marco de colaboración entre Axencia Turismo de Galicia e Axencia de Turismo de Galicia e o Concello de Abegondo para a realización da segunda fase do proxecto do plan estratéxico do encoro de Beche.

Que existe converxencia de intereses entre as entidades asinantes en orde á consecución obxecto referido.

Que o instrumento convencional que se pretende asinar se **fundamenta** no seguinte:

Primeiro.- Ao abeiro do disposto na Lei 5/1997, do 22 de xullo, de Administración local de Galicia, a Xunta de Galicia e as entidades locais poderán celebrar convenios de colaboración entre si para a máis eficaz xestión e prestación de servizos da súa competencia, podendo coordinar as súas políticas de fomento dirixidas a un mesmo sector, executar puntualmente obras ou servizos e adoptar as medidas oportunas para acadar calquera outra finalidade de contido análogo.

Que os concellos, segundo se sinala no artigo 25.2.h) da Lei 7/1985, do 2 de abril, reguladora das bases de réxime local, posto en relación coa Lei 7/2011, do 27 de outubro, do turismo de Galicia, teñen competencias en materia de turismo, en concreto a "*información e promoción da actividade turística de interese e ámbito local*".



Segundo.- O artigo 148.1.18ª da Constitución establece como competencias da Administración Xeral do Estado que poderán asumir as Comunidades Autónomas, a relativa á promoción e ordenación do turismo no seu ámbito territorial.

Que a Comunidade Autónoma de Galicia ten competencias, con carácter exclusivo, tal e como se desprende do contido do seu Estatuto de Autonomía, en materia de promoción e ordenación do turismo dentro da comunidade (artigo 27.21).

Terceiro.- Que a Axencia Turismo de Galicia, segundo o Decreto 196/2012, do 27 de setembro, polo que se crea a Axencia de Turismo de Galicia e se aproban os seus estatutos, é a entidade pública instrumental da Comunidade Autónoma de Galicia á que lle corresponde o exercicio, entre outras, das competencias en materia de coordinación, impulso, xestión e execución das actividades de promoción do turismo, programa 761A.

Para lograr esta finalidade a Axencia Turismo de Galicia acomete, no ámbito das súas competencias, un decidido apoio á promoción e fomento do sector turístico de Galicia a través daquelas accións que lle permiten acadar os seus obxectivos. No exercicio das súas funcións correspóndelle executar as medidas definidas para a promoción e fomento do sector turístico de Galicia, levar a cabo plans e programas de acción e colaborar no desenvolvemento de actuacións que lle permitan acadar os seus obxectivos.

Cuarto.- As entidades locais teñen atribuídas, a teor dos artigos 80 da Lei 5/1997, do 22 de xullo, de Administración local de Galicia e 25.2 h) da Lei 7/1985, do 2 de abril, reguladora das bases do réxime local, posto en relación coa Lei 7/2011, do 27 de outubro, do turismo de Galicia, competencias en materia de información e promoción da actividade turística de interese e ámbito local.

Entre as competencias que, no relativo ás relacións coas entidades locais galegas, lle corresponden á Xunta de Galicia, de acordo co disposto nos artigos 194 e 195 da Lei 7/1997, do 22 de xullo, de administración de Galicia, está a de cooperación e colaboración, as cales se poden levar a cabo mediante a formalización de convenios, e para lograr esta finalidade a Axencia Turismo de Galicia, acomete, no ámbito das súas competencias, un decidido apoio ás iniciativas das entidades locais.



Quinto.- Que a celebración do Ano Santo Xacobeo no ano 2022 constitúe para a Comunidade Autónoma de Galicia unha oportunidade de potenciación de Galicia, así como de promoción e de reforzo da dimensión internacional do Camiño de Santiago e da propia comunidade.

Na Idade Media, viaxeiros procedentes do norte de Europa, especialmente de Inglaterra, desembarcaban nas costas coruñesas para iniciar a súa peregrinación. Ben partindo da Coruña ou de Ferrol, uníanse na aldea das Travesas (Abegondo), nas inmediacións de Hospital de Bruma (Mesía), e continuaban en dirección a Santiago de Compostela. Este percorrido coñécese como o Camiño Inglés e é un dos que transcorren de forma íntegra pola provincia. Son terras que destacan especialmente polo seu patrimonio cultural, como se comproba xa ao comezo: a Torre de Hércules, o faro romano Patrimonio da Humanidade que se atopa na Coruña, era e é a encargada de guiar ás embarcacións que atravesan o corredor atlántico. En tempos xa máis recentes, se algunha destas embarcacións quería entrar na ría de Ferrol, dúas construcións militares estratexicamente colocadas a ambos os dous lados da ría controlaban o seu acceso: os castelos de San Felipe e da Palma.

Saíndo de Ferrol, percórrense os concellos de Narón, Neda, Fene, Cabanas, Pontedeume, Miño, Paderne, Betanzos, Abegondo, Mesía, Ordes, Oroso e Santiago de Compostela.

A Axencia Turismo de Galicia está por tanto interesada tanto na súa mellora e posta en valor, como na atención e coidado ao peregrino.

Sexto.- O presente convenio ten por obxecto a execución da segunda fase do proxecto do plan estratéxico do encoro de Beche.

O encoro, convertido nun parque fluvial navegable, inaugurou as súas instalacións xunto á presa, a única navegable que existe na comarca. Trátase dunha zona con mesas e bancos, grellas cubertas, un parque de xogos de aventura e unha zona verde. A área recreativa conta, ademais, cunha zona de terra e de auga pensadas para quen se achegue á presa para practicar diversas actividades, como a pesca deportiva, kaiak, vela lixeira, bicicleta e sendeirismo.

A idea do Concello de Abegondo é a de ampliar os usos da contorna do encoro. De aí que levou a cabo no ano 2021 o Plan Estratéxico do Embalse de Beche. O plan estratéxico pretende crear un polo de atracción no percorrido do Camiño, que sirva como parada obrigatoria para os peregrinos e que ao mesmo tempo dea servizo aos cidadáns de Abegondo e da contorna inmediata.



A etapa do Camiño de Santiago de Betanzos a Mesón do Vento, no Camiño Inglés, experimentou varios cambios. Especialmente o tramo de Presedo a Hospital de Bruma, onde se estableceu unha desviación que transcorre por un dos laterais do encoro de Beche, posibilitando o paso de peregrinos por esta contorna.

A primeira acción proposta para poder aproveitar os recursos naturais e xeográficos do encoro, levouse a cabo na primeira fase do Plan Estratéxico de Beche, no que se construíu un campamento turístico, que se prevé inaugurar esta primavera. Con esta actuación poderase dar aloxamento tanto a peregrinos como a outra pluralidade de usuarios que, atraídos pola contorna e o resto de actuacións xa executadas, opten por planificar a súa estancia no campamento turístico de Beche.

O Concello de Abegondo pretende engadir novos usos á área recreativa de Beche e a súa contorna, co que proxecta levar a cabo unha segunda fase do Plan Estratéxico do Embalse de Beche. A actuación para a que se solicita a axuda xorde co fin de dotar o municipio dun polo de atracción turístico e de servizos da contorna do encoro de Beche, onde xa existen instalacións municipais que se complementarían coas propostas.

As obras que se pretenden realizar consisten na construción dunha piscina exterior e o acondicionamento e axardinamento da zona e instalacións complementarias. Preténdese que a construción da piscina ao aire libre se integre perfectamente na contorna, evitando a xeración dun impacto visual considerable e que permita desfrutar desta instalación a usuarios de todas as idades, así como a non interferencia entre os demais usuarios da contorna.

Que a través deste convenio, outórgase ao concello de Abegondo unha subvención directa en virtude do disposto no artigo 19.4 c) da Lei 9/2007, do 13 de xuño, de Subvencións de Galicia, polas razóns de interese público, expostas nos puntos anteriores e que dificulta a súa convocatoria pública, de conformidade co previsto no artigo 26.2.a) da Lei 9/2007 do 13 de xuño, de subvencións de Galicia.

Que os intereses converxentes das partes asinantes exclúen o ánimo de lucro, e non poden satisfacerse axeitadamente mediante a celebración dun contrato dos contemplados na Lei 9/2017, do 8 de novembro, de contratos do sector público, pola que se transpoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, de 26 de febreiro de 2014, ou doutro instrumento alleo á natureza estritamente convencional.



En atención ao exposto, e a fin de dar cumprimento ao preceptuado no artigo 15.2. da Lei 1/2016, de 18 de xaneiro, de transparencia e bo goberno, estímase xustificado o recurso á sinatura do instrumento convencional que se pretende, con exclusión doutras figuras.

E para que conste, asíñase esta memoria, en Santiago de Compostela

O xerente de Turismo de Galicia

Antonio Casas Calviño

